



JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIÁL

***Komunikadu Imprensa***  
***Tribunál Distritál Dili***  
***23 Setembru 2014***

### **Tribunál kondena prizaun efetiva ba krime inestu: JSMP fiar provizaun espesial nesesariu atu kontribui ba prevensaun**

Iha 22 Setembru 2014, Tribunál Distritál Dili prezide leitura akordaun no kondena arguidu IS ho pena prizaun tinan 14 tanba provadu komete krime abuzu seksuál ba menór ho natureza inestu, iha Distritu Dili.

Ministériu Públiku akuza katak arguidu ne'ebe nu'udar lezada nia aman padrastu obriga lezada kaer no kose nia orgaun sensitivu ba iha lezada nia orgaun seksuál. Kazu ne'e akontese hahu tinan 2013 to'o 6 Maio 2014, no arguidu komete aktu ne'e dala lima ona hasoru lezada. Iha akontesementu ne'e lezada sei iha idade tinan 13.

Ministériu Públiku akuza arguidu kontra artigu 177 kona-ba abuzu seksuál ba menór ho artigu 182 alinea (d) kona-ba agravasaun nomos artigu 35 kona-ba krime iha konkursu tuir Kódigu Penál konjuga ho artigu 2 no 35 alinea (b) Lei Kontra Violénsia Doméstika.

“Inestu nu'udar violasaun seksuál ne'ebé grave tebes tanba aktu ne'e kontra labarik sira-nia direitu atu livre husi kualker forma violénsia. Violasaun seksuál ne'ebé akontese iha familia prejudika no ofende tebes valores sira sosial iha sociedade. Tanba ne'e prezisa dezenvolve mekanismu propriu ida ba prevensaun adekuaudu atu proteze labarik sira tuir realidade sosial Timor Leste nian,” dehan Luis de Oliveira Sampaio, Direitór Ezekutivu JSMP.

Tribunál konsidera faktu hotu provadu, bazeia ba konfisaun arguidu, depoimentu lezada no relatóriu mediku. Tribunál halo kumulasaun juridiku husi krime ida-idak iha konkursu ne'ebé arguidu komete dala lima hasoru lezada ho kondensasaun kada krime tinan 7 prizaun. Tribunál mós hare ba medida koasaun ne'ebé durante aplika ba arguidu iha prizaun preventiva, ho sirkunstánsia ne'ebé haleu krime ne'e, tribunál konklui pena unika hodi kondena arguidu ho pena prizaun tinan 14.

JSMP louva Tribunál konsidera aktu sira iha kazu ne'e tanba konstitui liu hosi aktu krime ida no konsidera sirkunstansia agravantes kona-ba abuzu abuzu autoridade iha kazune'e. Mesmu nune'e, JSMP konsidera katak laos kazu hot-hotu fasil atu akuza. Arguidu sira laos sempre konfesa faktu sira ne'ebe akuza ba sira no iha kazu barak vitima la hetan relatoriu mediku.

Nune'e mos difisil liu atu julga kazu inestu ne'ebe vitima tama ona ba tinan 14 ba leten tanba kazu sira ne'e tenke ho natureza violensia seskual (artigu 172) ka koasaun seksuál (Artigu 171) ne'ebe rekere prova uza forsa no violensia hasoru vitima.

Tanba ne'e, JSMP fiar katak tenke iha provizaun espesifiku kona-ba inestu, atu nune'e embora uza forsa ka lae bele aplika ba kualker idade. Provizaun ketak ida kona-ba inestu sei rekoñese natureza gravidade hosi krime hirak ne'e no fo protesaun diak liu ba vitima violensia seksuál sira.

Kazu ne'e rejista ho Númeru Prosesu: 560/2013/TDD. Dr. Julio Gantes reprezenta juis kolektivu prezide julgamentu ne'e, Dr. Felismino Cardoso reprezenta ministériu públiku no arguidu hetan defeza husi Dr. Manuel Sarmiento husi eskritóriu defensór úbliku.

Atu hetan informasaun kompletu, favor bele kontakku direktamente ba:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl